


TEZAUUR LITURGIC
26 DECEMBRIE

SLUJBA
SF. CUVIOS-MUCENIC
ISAACHIE II
BOBRAKOV
DE LA OPTINA



MOSCOVA, 2000



СЛУЖБА ПРЕПОДОБНОМУЧЕННИКУ ИСААКИЮ СТАРЦУ ОПТИНСКОМУ

На Господи воззвах стихиры гл. 6

Преславно совершив крестоношения путь /
постнически подвизався / еже по образу прежде
бывших отцев, / вся плотская мудрования духу
повинул еси, / душу молитвою просветил, /
образ был твоему стаду / юже не дал еси в снесь
безбожным врагом, / и душу свою за овцы
положил, / темже венчался еси победы венцем,
/ живоначальною Дланию, преподобномучениче
Исаакие.

Днесь тобою хвалится собор Оптинский, /
имуща тебя добля страдальца и исповедника, /
Крестом бо гордыню диаволю посрамил / и
щитом веры безбожных шатания низложил, /
светолития Ангельского достигл еси, / отцем
оптинским преславно сочетался / венченосче
Исаакие, / новомучеников Российских славо.
Якоже звезда воссиял еси в нощи, / тьму
безбожия прогоняя, / иноком облистал еси путь
светозарнейший, / риз очервлением своея
крови, / дерзновенно вшел еси во святая
святых, / и Пресущественному поклонился, /
дариносяще раны красного исповедания, /

темже молися Христу / даровати вселенней мир
и велию милость.

Слава гл. 8

Велий день нынешнего торжества, / Оптиная
Пустынь в виссон святых одеяся, / и
багряницею мученической крови украшается, /
прославляя своего последняго архимандрита, /
преподобномученика Исаакия, / законно
подвизавшегося, / и власть безбожную
мужественно обличившаго, / дары прнесши
Христу всебогатя, раны на теле огнепальныя,
яко жертва всесожигаемая; / темже Тому
молися отче прилежно / еже избавитися стаду
твоему муки вечныя, / и мир глубоцый Церкви
Русския испроси / и Отечеству на враги победы.
И ныне: праздника

На стиховне стихиры праздника

Слава святому, гл. 5

Краснейшее прозябение Оптиной Пустыни, /
новомученников благовонный цвете /
страстотерпче Исаакий, / добропобедный
мучениче, / днесь приемлет венец нетленный от
Богородицы, / и источает исцеления струи, /
всем верно поющим его страдания, / яко
дароцарственное приношение, / в яслех
Лежащему и пеленами Повитому / нас ради

Младенца зрак восприимша, / Единому
Многомилостивому.
И ныне: праздника

Тропарь преподобному гл. 1

Венечник явился еси преподобномучениче
Исаакие / яко враги Креста Господа твоего
низложил еси, / старцем оптинским поревновал
еси / и с новомученики Российскими
прославился еси / темже мы тебе с любовью
вопием: / слава Давшему ти крепость, / слава
Венчавшему тя, / слава Действующему тобою
всем исцеления.

Ин тропарь гл. 4

Страданьми твоими, отче Исаакие / возсия
стране Российстей свет разума / в ней бо
звездам служащие, / Кресту ныне кланяются /
удобрившися кровью новомученник / земля
Русская плод православнаго исповедания
принесе; / Господеви поющее, Слава Тебе.

НА УТРЕНИ

По 1-м стихословии седален гл. 2

Верно сошедшися днесь мучениколюбцы, видите
подвиг преславный и паче ума, како любовью
распаляемь, всехвальный, ко Христу, силою Того
и твердо укрепляем, на смерть дерзнул и врага

безбожнаго посрамил еси, людей священных предпослал еси в радости на небеса, Отроча Младо прославляя отче отцев Исаакие, молися прилежно спастися душам нашим.

Слава и ныне: праздника

По 2-м стихословии седален гл.

Блажен еси мучениче преподобне Исаакие; преподобен убо яко правду возлюбил и благодать приял еси; мученик, яко ничесоже тебе от любви Христовы отлучи, глагол твой: от креста своего не побегу, исполнил еси, и сего ради радуешися отче блаженне, яко мзда твоя многа на небесех, и молитва со дерзновением.

Слава и ныне: праздника

КАНОН ПРЕПОДОБНОМУЧЕННИКУ гл.1

Песнь 1

Ирмос: Христос раждается – славите! / Христос с Небес – срящите! / Христос на земли – возноситеся! / Пойте Господеви, вся земля, / и веселием воспойте, людие, / яко прославися.

Всесовершенну жертву, и благовонну принесл еси Тебе Христе, Исаакий славный новомученик оптинский; уст исповедание и страдальческое житие и от безбожных заклание, темже с небес его славу срящем и от земных возносимся, и песенными увязаем венцы, яко прославися.

Слава: Благочестие воспитанием приял еси преподобне млад был и порока удаляяся Богомладенца Христа чистым умом славословил еси, и сыновство твое тем чисте Богу явил. И ныне: Лоно Церкви ти бысть возрождение, отче Исаакие, якоже Лоно Девы Чистыя, Христу; воплощение и славное рождение; темже жертвою одушевленной почитаеши Тоя Собор, яко прославися.

Песнь 3

Ирмос: Прежде век от Отца рожденному нетленно Сыну / и в последняя от Девы воплощенному безсеменно, / Христу Богу возопиим: / вознесый рог наш, / Свят еси, Господи.

Прежде век от Отца Рожденному Господу Иисусу, возжелал еси всем сердцем послужити, мирския пристрастия превременныя отвергл еси, и во Христа облеклся, житием монашеским возвысился еси, и свят еси, отче, явился.

Слава: Божий дом ти бысть, Оптина вторый, преподобне наказания дивных старцев мудрым сердцем приял и воплощение Христово яве познал, ум в горняя верою вперил, и слава в вышних со безплотными славословил еси.

И ныне: Яко в последняя от Девы Свет нетленный Отчий возсиявший, миру яве

проповедал еси, и велегласно воплощение
Христово безбожным исповедал еси, и плод
устен твоих бысть ти во спасение, Исаакие
досточудне.

Седален гл. 4

Самого себе принесл еси от Девы Рождшемуся
Божию Слову: жертва исповедания и жертва
страданий твоих паче ладана бысть и злата,
Исаакие преподобномучениче крепкий;
безбожных дерзость посрамил еси и венец
победных почестей во страданиях приял еси;
темже молися прилежно Христу, спастися
душам нашим.

Слава и ныне: праздника.

Песнь 4

Ирмос: Жезл от корене Иессеова / и цвет от
него, Христе, / от Девы прозябл еси, / из горы,
Хвальный, приосененная чащи / пришел еси,
воплощся от Неискусомужная, /
Невещественный и Боже. / Слава силе Твоей,
Господи.

Жезл игуменский тебе прияти, блаженнаго уста,
прорекают и цвет от него венца мученическаго
прозябение, уверяет, егда первее пришел еси во
обитель, отче Исаакие, преподобномучениче.

Слава: Невещественным чинам поревновал еси, егда в лик иноческий вченился еси; смирение яко злато, послушание яко смирну, и молитву яко ладан, Рожденному от Неискусомужных, Господу принесл еси, якоже иногда волсви. И ныне: Старца Иосифа ты присный был учениче, и от него любити Матерь Божию научився; той бо любимиче от Нея наименован был, и тайнозритель явился, блаженный.

Песнь 5

Ирмос: Бог Сый мира, Отец щедрот, / Великаго Совета Твоего Ангела, / мир подавающа, послал еси нам; / тем, Богоразумия к свету наставльшеся, / от нощи утренююще, / славословим Тя, Человеколюбче.

Богомудрыми старцами просвещен, отче преподобне Исаакие, от нощи страстей исшел еси, светел словом, светел и умом явился еси, темже и священства честь приемлещи, и славословиши присно, Господа Человеколюбца.

Слава: Сотайник старца Нектария был еси отче, и Анатолия–утешителя друже, и всему собору Оптинскому сопричастник и венценосец блаженный явился еси, и небеснаго Иерусалима славный гражданин.

И ныне: Чин Богослужбный право правя, священнословию смиренному братию научал

еси: едиными усты и единым сердцем воспоем, Богородице, о братие, якоже Ангели на небеси тако и мы: Радуйся Благодатная Господь с Тобою.

Песнь 6

Ирмос: Из утробы Иону младенца изблева морской зверь, / якова прият; / в Деву же всельшееся Слово / и плоть приемшее пройде, сохраншее нетленну: / Егоже бо не пострада исления, / Рождшую сохрани неврежденну. Зверообразную пасть безбожной власти, крестом препнул еси, поглатити хотящую Церковь Русскую, Исаакие ратоборче славный; на судище стал еси мужественне и Христа исповедал, и верныя утвердил и полки монашествующих воодушевил еси, последний архимандрите Оптинский.

Слава: Бурю злобы и волны гонений мужеством души усмирил еси, премудре Исаакие, еще пять лет кораблекрушение обитель твоя не терпит, Кормчему бо вселенная вручил еси тоя водительство, но и до ныне Церковь Русскую хранит, новомученик молитвами.

И ныне: От Девы родшемуся Христу принесл еси дары пребогатая Исаакие: житие чистое, добродетельми паче злата блищащее, и

исповедание благовонно и сладко, и страдания благоприятныя, не якоже смирна тленная.

Кондак гл.3

Новомученников предивная доброто /
Венценосче Исаакие / страданьми твоими собор
Оптинский украсился; / Крест бо Христов и
уничужения в похвалу себе вменил / о земном
пренебрегл еси / душу твою за други положил
еси / и в место небеснаго упокоения отшел еси /
и оттуда точиши исцеления / верно чтущим
память твою.

Икос:

Приидите вси мучениколюбцы и Креста чтители,
подивитесь подвигу мудрому: се бо изначала
предреченный крест, Исаакий в сердце любовию
приим, и им распял еси страсти и похоти, и на
конец поприща, вожденный достиг: не побегу
от креста своего, мудрый глаголет старец
Оптинский; им бо вселюся в рай, и токи
исцелений источу, верно чтущим память мою.

Песнь 7

Ирмос: Отроцы, благочестию совоспитани, /
злочестиваго веления небрегше, / огненнаго
прещения не убояшася, / но, посреде пламени
стояще, пояху: / отцев Боже, благословен еси.

Благочестию совоспитался еси, со богомудрыми старцами Оптинскими; Дух Премудрости, Дух страха Божия в сердце стяжав, темже и на судище ужасаеши ответами богомудрыми, и дерзость нечестивых посрамил еси: отцев Боже благословен, во страданиях пел еси веселящися. Слава: На камени твердем исповедания Христа, поставил еси нози твои красныя, мучениче Исаакие, и щит веры Крест приим, и лаяния и клеветы заградил еси безбожных псов, едину истину отвещевал: отцев Боже благословен еси. И ныне: Тебе ради от Девы Рожшемуся и пеленами в яслех повитому, Исаакий преподобномученик связуется, и в темнице темней затворяется: благословен еси вопия, Боже отец наших.

Песнь 8

Ирмос: Чуда преестественнаго / росодательная изобрази пещь образ: / не бо, яже прият, палит юныя, / яко ниже огонь Божества Девы, / в Нюже вниде утробу. / Тем, воспевающе, воспоем: / да благословит тварь вся Господа / и превозносит во вся веки.

В пещи скорбей и яростных гонений вернии изнемогаша и колебашася, но ты громогласным исповеданием яко роса неботочная явился еси Исаакие, и верою несумненною исполнил еси

сердца: да благословит Церковь Русская, Господа и превозносит во вся веки.

Слава: Оружием веры победил еси супротивных полки Исаакие мудре, и токи кровей угасил еси огонь нечестия, темже с небесе подаеши благодать всеобильно, верою благословящих Господа и превозносящих во вся веки.

И ныне: Стратотерпца Исаакия память верно совершаем Мати Бога Вышняго, страданьми бо своими Твой праздник почтил есть, капли кровей, Ти, яко рубины дарует, якоже древле камня драгия, Сыну Твоему волхвы.

Песнь 9

Ирмос: Таинство странное вижу и преславное: / Небо – вертеп, Престол Херувимский – Деву, / ясли – вместилище, / в нихже возлеже Невместимый – Христос Бог, / Егоже, воспевающе, величаем.

В Пренебесный Райский Чертог вшел еси отче Исаакие и Пресущественному и Невместимому поклонился еси досточудне, дариносяще житие скорбми очищенное и яко златый сосуд, сердце любви и фимиама молитв исполнено; темже облаговонствуй твоим посещением, тя величающих.

Слава: С ликом отцев Оптинских сочетался еси славне, и радости святых и светлости

Ангельской сподобился еси, той и нас причастниками соделай богоблаженне отче, скудныя дары тебе принесшыя.

И ныне: Нову мелодию днесь песнотворит Исаакий новомученик оптинский, Собор Твой Дево чтит страданьми и красным исповеданием, и яко фимиам возносит Ти умную сердца песнь, Тя величаючи.

КАНОН ПРЕПОДОБНОМУЧЕННИКУ гл.4

Песнь 1

Ирмос: Моря Чермную пучину / невлажными стопами / древний пешешествовав, Израиль / крестообразныма Моисеовыма рукама / Амаликову силу в пустыни победил есть.

Монашествующих недвижимое основание, запинателя же сопротивных крепка, тя любовию почитаем, отче Исаакие, и в молитвах призываем верно.

Инок истинен был еси, пространнаго пути удаляся, тесный же предпочитая, достигл еси широты мученическа и высоты исповедания, но и нас чтущих тя поминай.

Слава: Бога узрел еси действо, имея житие отцев твоих образно, отче, и Сего исповедал еси твердо, на судище законопреступных.

И ныне: Пламеноносная клеще, Юже Исаия виде
иногда, вещественные сердца моего страсти,
Богородительнице попали, и до конца потреби.

Песнь 3

Ирмос: Лук сильных изнеможе, / и
немоцствующи препоясашася силою, / сего
ради утвердися в Господе сердце мое.

Простотой сияя истинной, и всякия добродетели
образом и разумом, начальник славнаго собора
был еси достоин, благодатию водим и молитвами
отцев твоих.

Тридесят лет в подвизе совершил еси, пастырь
обители поставляешися, желая всех привести ко
спасению, мучения светлостию сам украсился
еси.

Слава: Уязвился еси любовью Владыки всех,
мучениче досточудне Исаакие, и умрети Его
ради преусердствовал.

И ныне: Доиши матеролепно Питетеля всех, о
Дево, и носиши Сего на объятых Чистая.

Всяческая рукою Носящаго всегда.

Седален:

Препрославлен и предивен во святых Твоих,
Господи Боже наш, яко уверил еси
свидетельство Свое, когда отец наш Исаакий
блаженный и преславное воинство его, от креста

своего не побежаша, но с крепостию поразиша
безбожных дерзкую немощь и лжу.

Слава и ныне, праздника.

Песнь 4

Ирмос: Вознесена Тя видевши Церковь на
Кресте.

Сердце твое скрижалъ чисту нашедши,
благодать Святаго Духа, отче Исаакие, дарова
тебе исповедания и мучения заповедь, веру
тверду и святую любовь.

Небесное уготовася жилище, яко страдальцу
тебе, славне, от земныя бо преложился еси
тесноты, вопия Владыце твоему, слава силе
Твоей Господи.

Стена нерушима и столп крепок был еси
гонимым людям твоим, и настоятель премудр
Оптиной пустыни, егда наста година лютая и
недоумений время.

Слава: Аще и взят был еси нуждею от обители
твоя, преподобне, обители многи и чудны
наследовал еси в селениях праведных, от земныя
прелести нам избавитися помощи.

И ныне: Научився Духом пророческий
преславный лик, еже паче ума Твоей тайне,
Богородице, и различнообразно сию
предначертает священными образы, ихже конец
зрим светло.

Песнь 5

Ирмос: Ты Господи мой, свет в мире пришел еси:

Усердно последовал еси Звавшему тя, преподобне, когда ты пастыря Своим овцам устрояет, егда и исповедания столп ты показа, и мучения светлостию украси.

Весь распялся еси миру, отче Исаакие, Крест Христов на рамо взем блаженне, и того стражем подобяся, причастник был еси воскресения и славы лучшия, в нейже и нас поминай.

Велику крепость подаде ти Бог, егда посреде великих, начальника ты постави, отче.

Слава: Плоды прозяб духовными, рай явился еси украшен добродетельми, и объемлем огнем мучения, в снесь Богу познаваешися.

И ныне: Даниил Тя гору великую, Духом зряще, Богородице, от неяже Камень отсекается, сокрушает демонов истуканныя.

Песнь 6

Ирмос: Пожру Ти со гласом хваления Господи:

Руку ми прости яко Петрови, и возведи из глубины, Боже, молят бо Тя присно старцы блаженнии, ихже Исаакий добрый венечник, и якоже онаго мя спаси.

Мира добродетели твоя, не терпя собор
законопреступных, в темницу ты затвори, идеже
облаговонил еси сердца верных.

Слава: Благочестия проповедник житием своим
быв прехвальне, и нечестия обличил еси немощь,
Исаакие и верных утвердил еси непоколебимо,
собрание.

И ныне: Божественная Лествице, Юже виде
Иаков, по Нейже сниде Бог, вознося нас,
прилежно моли со святыми ущедрити нас.

Кондак и Икос общие преподобномученику.

Песнь 7

Ирмос: Спасый во огни авраамския Твоя
отроки:

Отче, предстателю и молитвенниче,
непоколебимый Исаакие, вознеси моления чад
твоих милостивому Богу, и испроси нам велию
милость.

Уд Христовы Церкви благопотребен и честен был
еси, и причастник Собора священнаго,
поставляя патриарха Тихона страдальца, и сему
последуя усердно к нетленной славе.

Якоже мученик подвизался еси отче, и украсил
еси ликостояния преподобных, яко венценосец
всех осиял еси, Божие достояние, защитниче
всем буди, о Исаакие.

Слава: Очервленишася воистину кровию ваши ноги, и быстрее к небесем потекоша, со грехом землю оставльше, новомученицы, собеседницы Божественным силам.

И ныне: Помилуй нас, Чистая, помилуй, ибо от дел спасения отнюд несть нам, темже верою теплою к Тебе вопием, помилуй рабы Твоя.

Песнь 8

Ирмос: Избавителю всех Всесильне:

Закон Божий сохраняя невредимо преподобне, столп непоколебим обители твоей и людем был еси, и нас малодушных укрепляеши.

В подвизе послушания учинен быв на лета многа, дондеже навък Исаакие славне, всякия добродетели образ.

Ныне приспе память славных твоих страданий отче Святыи, веселящее благочестивыя души, верно чтущие тя, Исаакие.

Слава: Простерт имуще ум ко Единому Владыце, на мучения устремишася зельне, всехвальнии иже со Исаакием, и уязвляеми вопияху, благословите вся дела Господня Господа.

И ныне: Егда хочет душа моя, разлучитися от окаяннаго моего телесе, невидимых враг томительства, избави мя, Богоневестная.

Песнь 9

Ирмос: Ева убо недугом преслушания клятву
вселила есть:

Закон божественный преподобно соблюдающе
добропобеднии, прилогам чуждаго мужеским
нравом противостасте, и уезвляеми телесы,
победу вечную мученицы взясте.

Людие беззаконнии и жестокии сердцем, не
послушаше словес любви твоея, и на убиение
осудиша тя, не терпит бо законнопреступный,
обличающих его, Исаакие.

Слава: Веселится отечество твое, и обитель тебе
воспитавшая, таковаго молитвенника тя имея, и
друга Божия тя нарицая, заступления усердно
просит.

И ныне: Пети Тя должны есмы, но воистину по
достоянию не можем, темже поем Тя, молчанием
чтоще несказаное, еже на Тебе Дево, содеянное
таинство.

Светилен. гл. 6.

Светлыя лозы, был еси, честная розга Христова,
многострадальне Исаакие всехвальне явлься, со
страждущими взывал еси: Ты мучеников,
Христе, светлое радование.

Слава и ныне, Богородичен: Праздника.

На хвалитех, стихирь, глас 6-й:

Поругания и изгнания венец достойно обнося, /
благозвания возжелал еси, нареченнаго
мучеником, / в темничном вертепе от
безбожных заключаемь, / Духа благодатию
помышление просветил еси, / болезни претерпел
еси дерзостным разумом / и кровию своею
прославил Едину Богородицу, // родшую Христа
Царя.

Приидите поклонитесь последнему
архимандриту, / слышано бысть от человека
Божия иногда, / ныне же егда от Девы родися
Господь, / во святыню одеялся еси Исаакие
блаженне, / небесножителю славне и мучениче,
/ Христов угодниче прехвальный, / темже
достодолжное поклонение тебе приносим отцу
нашему и просим, // молитву сотвори о душах
наших.

Крепость твоя и пение твое Господь / и
исповедание Его бысть ти во спасение, /
сердцем правостию и верою возвысился, / егда
на вольную смерть за Христа дерзнул еси, /
глаголя, от креста своего не побегу, / темже и
Никон блаженный ти простирает вайя глаголя;
/ благословен грядый страданьми почтити
Рождество Христово.

Слава гл. 8

Днесь собор старцев оптинских / благочестно
почитает собор Богородицы: / яко цари
персидстии ладон благохвалений и славословий
приносят / паче же злата аравийска житие
преподобномученика Исаакия / в горниле
скорбей и огнем гонений очищенное / и смерть
того и страдания паче смирны тленные / и
молят воплощеннаго Человеколюбца Христа /
еже спастися сыновом Россійстем / во
обновлении духа.

И ныне: праздника.

Славословие великое.

